

Զինապարտ տարիքի քրդերը զինւորական պարտականութիւն կը կատարեն իրենց մասերում, իսկ պատերազմի դէպքում կը կազմեն նոր մասեր էլ (երկրորդ և երրորդ հերթի զնդեր ու գումարտակներ), որոնց մի մասը կը յատկացւի ռազմաճակատին, միւսները կը մնան Ղարաբաղում:

Քրդական զօրամասերի կազմակերպութիւնը հանգամանօրէն մշակելու համար անհրաժեշտ է առ այժմ պարզել, թէ որքան հետևակ ու ձիաւոր մարտիկներ կարող են տալ քրդերը: Հաղորդելով ձեզ այս մասին՝ խնդրում եմ ձեր գերագանցութեան՝ յայտնել ձեր կարծիքը և հաղորդել խնդրած թւերը»:

Այս նամակը կատարեալ յստակութեամբ պարզում է, թէ ի՞նչ ուղղութեամբ էր զարգանում Ազրբէջանեան պետական միաքը, որի համար թիւրքական «համիդէ» զնդերը համարւում էին իդէալ: Յոյց է տալիս նաև, որ ազրբէջանցիները համար հերթի էր դրւում Զանգեզուրի կցումը, որպէս զի Սամուրից մինչև Արաքս հաստատուի Ազրբէջանի իշխանութիւնը:

Զանգեզուրը, ցարական իշխանութեան օրով, կազմում էր Ելիսաւետպոլի (Գանձակի) նահանգի մէկ գաւառը՝ Ղարաբաղի ու Պարսկաստանի միջև՝ արևմուտքից ունենալով Նախիջևանն ու Դարալագեազը, իսկ արևելքից Կարեաղինի գաւառը: Զանգեզուրի գաւառը բռնում էր 6743 քառ. վերստ տարածութիւն և 1916 թ. ունէր 226,398 բնակիչ, որից հայ՝ 95,054, թուրք չիա՝ 110,637, թուրք սիւննի՝ 8,966, քիւրդ՝ 3,638, ռուս՝ 1,709 և այլն*):

Զանգեզուրի վարչական սահմաններն էլ արհեստական կերպով գծւած էին այնպէս, որ ո՛չ մի ժողովուրդ նրա մէջ զգալի մեծամասնութիւն չէր կազմում: Ըստ հայկական վարչական վերաբաժանման ծրագրի Զանգեզուրից պէտք է գատէին մի շարք զուտ թրքաբնակ շրջաններ ու կցէին Կարեաղինի թրքական գաւառին, որով Զանգեզուրը կը դառնար հայ մեծամասնութիւն ունեցող (65 %) մի գաւառ՝ 136 հազար բնակչութեամբ, որից 88 հազարը հայ, 46ը թուրք և 2ը՝ ուրիշ ազգութիւններ:

Ռուսական յեղափոխութեան լուրը Զանգեզուրում էլ առաջ բերեց ընդհանուր ոգևորութիւն: Հետզհետէ ամէն կողմ կազմեցին յեղափոխական կոմիտէներ՝ փոխարինելու համար հին իշխանութեանը: Դէպքերի բերումով՝ գաւառը կտրւեց նահանգական կենտրոն Գանձակից և իր գործերը վարում էր ինքը՝ Գորիսի ու Հանքերի խառն կոմիտէների միջոցով: Այստեղ էլ հայերն ու թուրքերը սկզբի շրջանում ապրում էին հաշտ ու համերաշխ:

Մարտի սկզբներին Ղարաբաղն ու Զանգեզուրը միացեցին և կազմեց Գանձակից անկախ մի առանձին շրջան՝ Շրջանային Գործադիր կոմիտէի գլխավորութեամբ: Այս վերջինի ջանքերով կազմեց Գորիսի գործադիր կոմիտէ, որին ենթարկւում էին բուն Զանգեզուրն ու Սիսեանը, իսկ Ղափան—Մեղրիի շրջանը մնաց Հանքերի կոմիտէի իշխանութեան տակ:

*) Այս գլուխը կազմելիս աղբիւր եմ ունեցել՝ «Кавказский Календарь», 1917 г., А. Шахатунянъ. «Административный передѣлъ Закавказскаго Края». 1917. Тифлисъ. Այլև լայնօրէն օգտուի եմ գանգեզուրցի ծանօթ գործիչ Յ. Տէրունիի «Կառավարական Օրդանները Զանգեզուրում» ձեռագիր աշխատութիւնից ու Հ. Հ. Պատիրախուբեան դիւանի ցիւրքերից: